

## XV. IGANDEA URTEAN ZEHAR (A)

### Otoitza

Zure egiak, Jauna, argitu egiten ditu oker dabiltzanak,  
 bide zuzenera itzul daitezzen;  
 egizu, izenez kristau direnek  
 egintzetan bete dezatela eta agertu  
 beren kristau izatea.  
 Zure Seme Jesu Kristo.

I. IRAKURGAIA: Is 55, 10-11

*Euriak ernalarazi egiten du lurra.*

Isaias Profetaren liburutik

Honela mintzo da Jauna:  
 «Euria eta elurra zerutik jaisten dira,  
 eta ez dira berriro hara itzultzen,  
 lurra ase, ernaldu eta lehertarazi gabe,  
 ereileari hazia eman diezaion,  
 eta jaleari ogia;  
 hala izango da nire ahotik ateratako hitza:  
 ez da Niregana hutsik itzuliko;  
 baizik eta egingo du Nik nahi nuena,  
 eta beteko Nik agindutakoa».

ERANTZUN SALMOA: Sal 64, 10abcd. 10e-11. 12-13. 14

**R/. Lur onean erori zen haziak  
 ugari eman zuen alea.**

Agertu zatzizkio lurrari eta euriz beratu duzu,  
 oparo aberastu duzu.  
 Jainko-ibaia urez da betea,  
 eman diezu gari-alea. R/.

Zuk atondu baituzu lurra horrela.  
 Urez ase dituzu ildoak, lurrak berdindu,  
 euriz bigundu eta ernemuinak bedeinkatu. R/.

Zeure ontasunez burutu duzu urtea,  
 guritasunez jarioka daude zure bideak.  
 Mendiko larreak hor daude guri,

eta muinoak atseginez apaindurik. R/.

Zelaiak artalde z jantzi dira, ibarrak gariz estali,  
txaloka eta kantari. R/.

II. IRAKURGAIA: Erm 8, 18-23

*Izadia bera ere zain-zain dago,  
Jaungoikoaren seme-alaben agerkunde beteari itxaroten.*

San Paulo Apostoluak Erromatarrei

Senideok: Nire iritzian, oraingo neke-lanak ezer gutxi dira, gero guregan azalduko den aintzaren aldean. Izadia bera ere zain-zain dago, Jaungoikoaren seme-alaben agerkunde beteari itxaroten. Hutsaren menpeko egin baitago; ez, ordea, bere nahiz, menperatu zuen harengatik baizik. Baina, beti ere, izadiak berak badu itxaropen, ustelkeriaren morrontzatik aterata, Jaungoikoaren seme-alaben aintzazko askatasunera iritsiko dela.

Badakigu, jakin ere, izadi osoa orain arte, erdimenez eta intzirika dagoela. Eta ez hura bakarrik; bai gu ere, Espiritua lehen dohain bezala daukagunok intziriz gaude geure barruan, noiz Jaungoikoaren seme-alaba izango, noiz geure gorputza salbatuko!

EBANJELIOA: Mt 13, 1-23

### Aleluia

R/. Aleluia.

V/. Hazia, Jainkoaren hitza da; ereilea, berriz, Kristo;  
Honi aditzen dionak, izango du betiko bizia. R/.

Irakurgai laburragoa egin nahi bada, [ ] kako artean ematen den zatia utz daiteke.

*Atera zen ereilea ereitera.*

Jesu Kristoren Ebanjelioa San Mateoren liburutik

Egun hartan, Jesus etxetik atera eta itsas ertzean eseri zen. Jendetza handia bildu zitzaion inguruan, eta horregatik ontziska batera igo zen, eta han eseri. Jende guztia itsas bazterrean zegoen. Gauza asko esan zizkien parabolatan:

«Atera zen ereilea ereitera. Eta ereitean, hazi batzuk bide bazterrean erori ziren; etorri ziren txoriak, eta jan egin zituzten. Beste batzuk, lur gutxi zegoen leku harritsu batean erori ziren; berehala jaio ziren, lurra ez baitzen lodia; baina eguzkia atera orduko, erre egin ziren eta, zainik ez zutelako, ihartu. Beste batzuk arantz artean erori ziren; eta arantzek, hazi zirenean, ito egin zituzten. Beste batzuk lur onean erori ziren, eta eman zuten alea: batzuek bateko ehun, besteek hirurogei, eta besteek hogeita hamar. Belarririk duenak, entzun dezala».

[ Ikasleek, hurbilduta, galdera hau egin zioten Jesusi: «Zergatik hitzegiten diezu parabolatan?» Hark erantzun zien: «Zuei eman zaizue, zeruetako erreinuaren misterioak ezagutzera; horiei, berriz, ez. Izan ere, duenari eman egingo zaio eta gainezka izango du; baina ez duenari, duen hura ere kendu egingo zaio. Horregatik hitzegiten diet parabolatan: begiratu arren, ez dutelako ikusten; entzun arren, ez dutelako, ez aditzen ez ulertzen. Horietan betetzen da, Isaias profetak esandako hura:

"Zuen belarriz entzungo duzue, eta ez duzue ulertuko;  
zuen begiz begiratuko duzue, eta ez duzue ikusiko;  
gogortu egin baita herri honen bihotza.

Belarri-gogorak dira

eta begiak itxi egin dituzte:

begiz ez ikusteko, eta belarriz ez entzuteko;

bihotzez ez ulertzeko, eta ez bihotz-berritzeko,

Nik senda ditzadan".

Zorionekoak, ordea, zuen begiak, ikusten dutelako. Benetan diotsuet: profeta eta zintzo askok ikusi nahi izan zuen, zuek ikusten duzuen, eta ez zuten ikusi; eta entzun, zuek entzuten duzuen, eta ez zuten entzun.

Entzun, beraz, zuek ereilearen parabola: Erreinuko hitza entzun bai, eta ulertzen ez duenari, Gaiztoak, etorrita, kendu egiten dio bihotzean ereindakoa; hori da bide bazterrean ereindakoa.

Lur harritsuaren ereindakoa, hitza entzuten duena da eta, berehala hartan, pozik hartzen duena; baina zainik ez du, ezta iraupenik ere; eta hitz hori dela eta, eraso eta nekea sortu orduko, berehala hutsegiten du.

Arantz artean ereindakoa, hitza entzuten duena da; baina munduko grinek eta aberastasunen lilurek hitza ito egiten dute, eta uztarik eman gabe gelditzen.

Lur onean eraindakoa, berriz, hitza entzun eta ulertzen duena da. Hark, bai, ematen du alea: honek bateko ehun, hark hirurogei, besteak hogeita hamar».]

### **Oparigaien gainekoa**

Begira, Jauna, otoitzean dagoen Elizaren eskaintzari,  
eta iguzu, opari hau hartuko dugunok  
santuagoak izan gaitezela.

Jesu Kristo.

### **Jaunartze ondorengoa**

Zure dohainak harturik, otoitz egiten dizugu, Jauna:  
misterio hau ospatzen dugun bakoitzean  
gehitu dadila gure salbamena.

Jesu Kristo.